

եւ ընդ նմին զվայելուչ պատմութեանս, զայն ի բաց պատառեալ հրամայեր: 26 Զրաման տայր, եւ բերին զհանդերձս կղերիկոսաց զգեցուցանէին նմա. ետ հրաման, եւ կոչեցին զծերունի եպիսկոպոսն՝ որում անունն էր Փաւստոս, եւ տայր զնա ձեռնադրել ի սարկաւագութիւն: 27 Բայց յորժամ զհերսն դեռ վիրային ի նմանէ, առ յոյժ գեղեցկութեանն բազումք յարտասուս հարան՝ որք լուանն կամ տեսին, ի գեղն աւելկեալ՝ զկերպարանսն փոխելովն: 28 Այլ յորժամ տեսին զնա քրիստոսեան գեղովն զարդարեալ՝ բազմաց լինէր ուրախութիւն, յորժամ շնորհք բարերարք կոչեցին զնա լինել հոգեբարձու տանն Զրիստոսի:

29 Յայնժամ եղ Տեր ի միտս ամենեցուն խնդրել իւրեանց հովիւ զայն, որ խոցա կարող լինել զառաջնորդութիւնն կենացն ճանապարհին ցուցանել: 30 Եւ մինչ դեռ իսկ զձեւս զինուորութեան յինքեան բերէր յերեւելիսս, ներքին մարդովն զՔրիստոս էր զգեցեալ յանձն իւր, եւ ազնուական վարս էր յինքեան կերպարանեալ: 31 Եւ յուսովն՝ զոր ուներ՝ խաչեալ էր ընդ Քրիստոսի, եւ թաղակից եղեալ էր ընդ նմին. եւ սիրով հաւատոյ մեռեալ էր մեղացն, եւ յարութեան յուսոյն արդարութեամբ սպասէր: 32 Վասն այսորիկ յիրաւի արժանի եղել սա աթոռոյն հայրապետաց եւ տեղոյ հարցն իւրոց առաջնոց, զաթոռն Թադեոսի առաքելոյ, եւ ժառանգութիւն հաւրն մարմնապէս ի նոյն հոգեւորին Գրիգորի. այլ իբրեւ ի Տեառնէ եղել կոչումն նմա գալ յիրս այսպիսի, եւ էարկ ի միտս ամենեցուն խնդրել զսա արժանի այնմ իրին: 33 Իսկ նա յոյժ առ երկիւղածութեանն եւ բազում խոնարհութեանն զանձն իւր անարժան համարեալ իրացն, մեծ կարգաց աստիճանին Աստուծոյ, յոր ձգեալ էին զնա: 34 Այլ բռնաբարութիւն եւ միաբանութիւն եւ հրաման Աստուծոյ, մանաւանդ առ նախնեալքն, վասն նորա իսկ ասացեալ էր ի տեսլեանն Աստուծոյ առ Յուսիկն՝ եթէ այր լինելոց է ի սորա զաւակէ, լիցի լոյս աշխարհի:

ԳԼՈՒԽ Դ.

1 Յաղագս թէ ո՛րպէս առին զնացին եւ տարան զՆերսէս ի Կեսարիա. եւ եթէ զի՛նչ շատ սքանչելիք եղեն յԱստուծոյ, եւ կամ թէ ո՛րպէս հովուեաց իւրոց հաւտիցն առաքելաւրէն:

2 Ապա գումարեցին զիշխանսն մեծամեծս, զի առցեն զցանկային Ներսէս, եւ զնացեն ուր սովոր էին զհայրապետսն աւծանել: 3 Նա եւ բազմութիւն եպիսկոպոսացն Զայոց ժողովեցան առ թագաւորն վասն նորին խնդրոյն խորհել¹ ամենեցուն միով միաբանութեամբ զնա ընտրել, հաճոյ թուեցաւ ամենեցուն զի նստցի նա յաթոռ զխաւորութեանն: 4 Ամենեցուն միաբանութեամբ եպիսկոպոսացն եւ թագաւորին եւ աշխարհախորհ ձու-

1 Յոր խոնարհել